

Ultimo desaroyonan rond e hayazgo arqueologico significante na Santa Cruz



ORANJESTAD (AAN): Diamars na Museo Arqueologico a tuma lugar un conferencia di prensa pa duna un splicacion di e proceduranan cu ta andando actualmente cu e material arqueologico cu a worde haya durante excavacionnan cu a tuma lugar durante Januari 2012 te cu Augustus 2012, na Santa Cruz 35.

Drs. Raymundo Dijkhoff hefe di departamento científico di Museo Arqueologico a splica cu na 2001 durante construccion di un cas na Santa Cruz 35 algun weso a worde haya y e ora ey a haci un excavacion di emergencia, pa motibo di trabaonan di

construccion.

E hayazgonan a duna un indicacion cu ta trata di un sitio historico importante.

A haya 7 graf na e sitio y a saca tres skelet. Di e tres skeletnan dos tabata di mucha y uno tabata un adulto femenino. Dijkhoff a splica cu a haya tambe e tempo ey dos renchi di oro di cual uno tabata tin 9 esmeralda.

Tambe a haya un canica Spaño di oleifi, hunto cu diferente kraalchi di glas Europeo.

A haya tambe un cabez di ceramica indigena.

Dijkhoff a splica cu e tempo ey caba nan tabata sa cu ta trata di e periodo historico y tabata tin un sospecho cu nan tabata di e periodo. Spaño, entre 1515 y 1636.

El a bisa tambe cu e aña aki e intencion tabata pa saca e 4 skeletnan cu a worde laga atras.

E plan tabata pa den 5 siman saca esakinan.

Sin embargo tur cos a dura mas di 7 luna, unda cu a habri tambe un area di 60 meter cuadra di

e sitio arqueologico, cu ta un quarto parti di full.

e area di investigacion.

A haya un total di 37 graf, incluyendo e 7 grafnan di 11 aña pasa.

"E aña aki nos a bin habri 18 graf y nos a haya un total di 19 ondividuo".

"Tabata tin 4 graf cu tabata consisti di caha di morto, cu ta prome biaha den historia cu nos a haya esey".

Esaki segun Dijkhoff, kende a sigui bisa cu interesante tabata cu tur e individuonan den e grafnan tabata dera cu cabez na west y pia na oost.

Tabata tin un pareha grandi den posicion di man, cu ta un indicacion cu nan tabata catolico.

A haya diferente marca di staca tambe mescos cu na 2001.

E marcanan di staca probablemente tabata di periodo prehistorico, segun Dijkhoff.

El a bisa cu un di e stacan tabata duna e indicacion di ta parti di un cas prehistorico pues.

Tambe a haya diferente artefac-

to incluyendo dos real Spaño.

A haya tambe renchi di oro, restonan di palo di caha di morto, clabo y algun otro artefacto metal.

Tambe a haya diferente artefacto indigena di Indian, manera ceramica cu cocolishi di piedra.

A haya un medallon y beton historico.

Tur e ratronan tabata duna un indicacion cu tabata trata di e raza Indian, incluyendo Indian Caquetio y otro tipo di Indian. Tanto homber cu muher a worde haya den graf, di tur edad.

Di bay te cu hende mayor di edad.

E estaturanan tabata entre 1.47 y 1.78.

E estado di e wesonan a hacie dificil pa determina anomalia y trauma, pero tabata tin indicacion cu tabata tin individuo cu calculus, caries, mientras cu posiblemente osteoporosis, perioritis y schooliosis tabata presente.

Segun Dijkhoff, e resultadonan preliminar ta indica cu ta trata di un santana catolico di periodo historico cu ta di 1515 te cu 1880.

Muy probablemente ta trata di e periodo Spaño di 1515 te cu 1636, tanto trepan como lat.

"Esey kiermen cu mester tabata tin un misa den cercania, pues e prome misa di Aruba mester tabata ubica na Santa Cruz".

Esaki segun Dijkhoff kende a sigui bisa cu e santana ta representa un comunidad, un aldea, un pueblo cu nunca a worde menciona den ningun documento historico.

El a splica cu tur locual a worde haya ta refleha e modus operandi Spaño, esta di conquista y converti politicamente, religiosamente y linguisticamente. Esey kiermen cu ora cu e Spañonan tabata conquista e diferente teritorionan, nan tabata bay e capital di e pais, nan tabata substitui e lider politico, nan tabata kita e religion y pone e lugarnan sagrado catolico y cambia e idioma den Spaño. Segun Dijkhoff esey probablemente a sosode na Santa Cruz, pasobra den e tempo prehistorico Santa Cruz tabata e capital di Aruba.

El a splica cu 2001 y 2012 mester worde mira awor como parti 1.

Awor tin cu bay procesa informacion y material arqueologico. Pues tin cu bay laba e material, analiza y investiga esaki.

Despues tin cu entre otro registra y digitaliza e informacion y mester laga specialistanan nacional y internacional haci investigacionnan riba e artefactonan.

Tur cos mester worde publica despues y pasa via departamento educativo di Museo Arqueologico.

E idea ta pa na final esaki bira un publicacion grandi cu ta bay resulta den un PHD di Dijkhoff.

Dijkhoff durante e conferencia di prensa a gradici tur esnan cu a yuda tur cos cana bon, incluyendo Ministerio di Cultura, DOW, Franklin Bareño, ALEDA N.V y muy especial Notaris Tromp pa e cooperacion sublime.